

DOMINGU RAMOS – TINAN B

Tema

Liturjia domingu ikus Kuarezma nian konvida ita atu kontempla Maromak ne'ebé, tan domin, tuun mai hasoru ita, fahe ita-nia umanidade, halo An sai ema nia atan, husik ema oho Nia atu manán egoízmú no salan. Krús apresenta mai ita lisaun aas liu, ain-hakat ikus iha dalan moris foun nian, ne'ebé iha Jezús, Maromak propoin mai ita: saran moris tanba domin.

Leitura dahuluk apresenta mai ita profeta anónimu ida, Maromak bolu atu fó sasin iha nasaun sira leet Liafuan salvasaun nian. Maski hasoru terus no persegisaun, profeta ne'e konfia iha Maromak no konkretiza, ho fidelidade boot, Maromak nia projetu sira. Sarani sira iha tempu uluk haree iha “atan” ne'e Jezús nia figura.

Leitura daruak apresenta mai ita Kristu nia ezemplu. Nia hakribi egoízmú no foti-an, atu hili obediénsia ba Aman no servisu ba ema sira, to'o saran moris rasik. Maromak nia Liafuan propoin dalan moris ida-ne'e mai ita.

Evanjellu konvida ita atu kontempla Jezús nia terus no mate: momentu aas liu moris ida iha saran an no servisu, atu soi ita ema sira husi buat hotu ne'ebé lori egoízmú no moris-atan. Iha krús, revela tiha mai ita Maromak nia domin, domin ida ne'ebé la rai buat ida ba an rasik, domin ida ne'ebé sai don total.

LEITURA I – Is 50,4-7

Iha livru Deutero-Isaías (Is 40-55) nian ita hetan poema/dadolin haat (kf. Is 42,1-9; 49,1-13; 50,4-11; 52,13-53,12). Poema sira-ne'e apresenta figura enigmátika ida: “Jahwéh nia atan”. Atan ne'e simu misaun ida husi Maromak no misaun ne'e kona-ba Maromak nia Liafuan no soi karákteer universál; misaun ne'e nia tenke konkretiza liuhusi sofrimentu, terus no abandonu inkondisionál ba Liafuan no Maromak nia projetu sira. Maski nia misaun sei remata ho insusesu, profeta nia terus ne'e la leet de'it: nia iha valór kasu-salan no makso'n nian; husi ninia sofrimentu sei mai perdaun ba Povu nia salan. Maromak apresia profeta nia sakrifísiu no fó prémiu ba nia, hodi foti nia iha ema hotu nia oin, halo nia manán ninia funu-balu sira.

Sé loos profeta ida-ne'e? Ita la hatene; maski nune'e, figura ne'ebé poema sira-ne'e apresenta sei simu naroman husi Jezús Kristu nia roman, Ninia moris, Ninia destinú.

Testu ne'ebé ohin propoin mai ita mak knananuk datoluk “Jahwéh nia atan nian”.

MENSAJEN

Testu ohin nian haktuir personajen anónimu ida nia liafuan sira, hodi ko'alia kona-ba misaun Maromak haraik ba nia. Nia la hanaran an “profeta”; maibé, haktuir ninia vokasaun ho elementu típiku sira relatu profétiku vokasaun nian.

Uluknanai, misaun ne'ebé “profeta” ne'e simu husi Maromak mak haklaken Liafuan. Profeta mak ema Liafuan nian, husi nia Maromak ko'alia. Maromak mak fó forma ba profeta nia moris no nia la opoin rezisténsia ba bolun no mós ba Liafuan ne'ebé Maromak konfia ba nia; ninia atitude tenke ida rona nafatin nian, atu bele apresenta ho fidelidade, Maromak nia Liafuan ba ema sira.

Daruak, misaun profétika konkretiza iha sofrimentu no iha terus. Tema ne'e mak nafatin mosu iha literatura profétika: haklaken Maromak nia proposta sira provoka rezisténsia ne'ebé dalabarak nia konsekuénsia mak terus no persegisaun. Maski nune'e profeta la rezigna an; paixaun/domin ba Liafuan boot liu sofrimentu.

Datoluk, profeta iha konfiansa iha Na'i, ne'ebé la husik mesak ema ne'ebé Nia rasik bolu. Serteza katak nia la mesak, maibé Maromak nia kbiit hamutuk ho nia, halo profeta sai forte liután duké terus, persegisaun.

LEITURA II – Fil 2,6-11

Sidade Filipos nian mak sidade próspera ida, ho populasaun maioria veteranu tropa romanu sira. Sidade ne'e organiza tuir maneira Roma nian, no depende diretamente ba imperadór; nune'e mak nia goza priviléjiu hanesan ho sidade sira Itália nian. Komunitade sarani, ne'ebé Paulo funda, mak komunitade laran-manas ida, laran-luak, komprometida, nafatin iha atensaun ba Paulo no Igreja seluk nia nesesidade (hanesan kolekta sira halo ba Igreja Jerusalém nian – kf. 2 Cor 8,1-5). Paulo iha afetu/domin spesiál ba komunitade ne'e. Maski iha sinál pozitivu sira-ne'e, komunitade la'ós perfeita... Dezapegu, haraik-an no simplisidade la'ós valór sira ne'ebé ema boot riku komunitade nian sira apresia.

Iha enkuadramentu ida-ne'e mak ita koloka testu leitura ohin nian. Paulo konvida Filipense sira atu enkarna valór sira ne'ebé marka Kristu nia moris; tanba ne'e nia utiliza knananuk ida (pré-paulinu), ne'ebé sarani sira resita iha selebrasaun litúrjika sarani sira-nian. Paulo ho knananuk ne'e apresenta ba sarani Filipos nian, Kristu nia ezemplu.

MENSAJEN

Motivu knananuk nian mak Kristu Jezús ne'ebé temi iha inísiu no finál inu ne'e nian. Filipense sira, nu'udar kristaun, ne'e katak Kristu mak protótipu no tuir ilas ne'e mak sira tenke konfigura an. Oinsá loos ezemplu Kristu nian?

Uluknanai knananuk ne'e hatudu kontraste entre Adão (ema ne'ebé hakarak sai hanesan Maromak no dezobedese Nia – kf. Gn 3,5.22) no Kristu (Ema Foun, ne'ebé hatán ho haraik an no obediénsia ba Aman). Adão nia atitude lori frakasu no mate; Jezús nia atitude lori glória no moris.

Knananuk define “despojamentu” (“kenosis”) Kristu nian ho modu presizu: la foti An ba ninia kondisaun divina, maibé aseita sai ema, hodi asume ho haraik-An kondisaun umana, atu serví, atu fó moris, atu revela Aman. Maski nia Maromak no kontinua sai Maromak, Nia aseita atu tuun atu hasoru ema sira, sai servidór hodi garante moris foun ba ema sira. “Hatuun An” ida-ne'e sai eskándalu boot: Jezús aseita mate ne'ebé aat liu – mate iha krús – atu hanorin lisaun boot servisu nian, domin radikál, entrega totál moris nian.

Entrega an totál ba Aman nia planu la'ós frakasu ida: Kristu nia obediénsia no entrega ba Aman nia projetu rezulta moris-hi'as no glória. Konsekuénsia ba Ninia obediénsia, domin no saran An, mak Maromak foti nia ba “Kyrios” (“Na'i” – naran ne'ebé, Antigu Testamentu, troka ba Maromak nia naran ne'ebé labele temi); no umanidade tomak (“lalehan, rai no infernu sira”) rekoñese Jezús nu'udar “Na'i” be ukun rai tomak no prezide istória.

Iha-ne'e Paulo halo apelu ba Filipense sira no fiar-na'in hotu atu iha haraik-an, dezpojamentu, saran moris: sarani hotu tenke halo tuir Kristu nia ezemplu, atan terus-na'in no haraik an, ne'ebé halo nia moris sai don ida ba ema hotu. Dalan ne'e la hamohu ema, maibé lori nia ba glória, ba moris nakonu.

EVANJELLU – Mc 14, 1 - 15,47

Marcos buka apresenta Jezús nia figura tuir koordinada rua. Ida, ita haree dezenvolve iha parte dahuluk Evanjellu nian, apresenta Jezús nu'udar Messias, ne'ebé Maromak haruka ba ema sira atu propoin Reinu (kf. Mc 1,14-8,30); ida seluk, trata iha parte daruak Evanjellu nian, apresenta Jezús nu'udar Maromak nia Oan-Mane, ne'ebé atu kumpre misaun Aman entrega ba Nia, tenke liu husi mate, maibé Maromak sei halo Nia moris hi'as (kf. Mc 8,31-16,8).

Leitura ohin nian mak relatu Jezús nia paixaan. Relatu ne'ebé nia fundamentu mak akontesimentu konkretu sira, la'ós reportajen jornál ida kona-ba kondensasaan ema inosente ida ba mate de'it; maibé, liuliu, katekeze ida atu apresenta Jezús nu'udar Maromak nia Oan-Mane ne'ebé aseita kumpre Aman nia projetu liuhusi destinu krús nian. Marcos hakarak sarani sira bele to'o iha haklaken fiar, hanesan senturiaun romanu ne'ebé sai sasin Jezús nia terus no mate: “tebes duni, ema ne'e Maromak nia oan” (Mc 15,39). Ne'e mak Marcos nia objetivu, husi kedas inísiu nia Evanjellu nian (kf. Mc 1,1): apresenta Jezús, Mesias, Maromak nia Oan-Mane.

Betânia, senákulu, Jetsemani, amlulik-boot nia uma, pretóriu romanu, Gólgota no rate mak kadru sira ne'ebé hatudu sai asaun sira no demonstra Jezús nia filiasaan divina.

MENSAJEN

Ita tenke komprende Jezús nia mate iha kontestu ninia moris nian. Jezús hatene nanis katak Aman bolu Nia ba misaun ida: haklaken mundu foun, justisa, dame no domin nian ba ema hotu. Atu konkretiza projetu ne'e, Jezús la'o tuir dalan sira Palestina nian hodi “halo di'ak” no haklaken katak mundu foun besik daudaun. Nia hanorin katak Maromak mak domin no la esklui ema ida, maski maksalak sira; Nia hanorin atu labele marjinaliza leprozu sira, paralítiku sira, ema matan-delek sira, basá Maromak la fó malisan ba sira; Nia hanorin katak ema kiak no eskluidu sira mak Maromak nia preferénsia no sira-ne'e mak iha fuan disponivel liu atu simu “Reinu”; no fó hanoin ba ema “riku” sira katak egoíзму, orgullu, autosufisiénsia, taka an lori ba mate.

Jezús nia projetu libertadór xoke ho klima egoíзму nian, opresaan nian ne'ebé domina mundu. Autoridade polítika no relijioza sira sente Jezús nia denúnsia inkomoda sira: sira la dispostu atu hakribi mekanizmu sira ne'ebé asegura poder, influénsia, domíniu, priviléjiu ba sira; sira la dispostu atu aseita konversaun ne'ebé Jezús propoin. Tanba ne'e, sira kaer Jezús, tesi lia ba Nia no hedi Nia ba krús ida.

Jezús nia mate mak konsekénsia lójika husi anúnsiu “Reinu” nian: rezultadu mak tensaan no rezisténsia sira ne'ebé proposta “Reinu” nian provoka entre sira ne'ebé domina mundu.

Ita mós bele dehan katak, Jezús nia mate mak nia moris nia tutun; afirmasaan ikus maibé radikál no loos liu (tanba marka ho raan), kona-ba buat ne'ebé Jezús haklaken ho liafuan no jestu sira: domin, don total, servisu.

Iha krús, mosu Ema Foun, protótipu ema ne'ebé hadomi ho modu radikál. Tanba hadomi mak Ema Foun ne'e asume nu'udar misaun luta hasoru salan – katak kauza objetiva sira ne'ebé hamosu ta'uk, injustisa, terus, esplorasaan no mate. Nune'e, krús mantein dinamizmu mundu foun nian – dinamizmu “Reinu” nian.

Relatu Paixaan iha Marcos nia versaun, la dook husi versaun Mateus no Lucas nian; maski nune'e, iha koordinada ruma ne'ebé Marcos subliña ho modu espesiál. Entre sira-ne'e, ita destaka:

1. Iha prosesu tomak, Jezús hatudu serenidade/hakmatek boot, dignidade boot no konformasaun totál ho buat ne'ebé akontese daudaun. La'ós pasividade eh inkonxiénsia, maibé aseitasaun ho hakmatek dalan ne'ebé Nia rasik hatene liu husi krús. Ho ne'e, Marcos fó sai katak Jezús tuir ho modu perfeitu Aman nia projetu no ninia hakaran mak kumpre ho modu fiél no integrál Maromak nia planu, lahó objesaun eh rezisténsia. Jezús nia “dignidade” iha prosesu nia oin, prosesu ne'ebé autoridade relijioza no polítka sira halo hasoru nia, ita bele haree iha momentu oioin:

- Mateus no Lucas hatudu Jezús interpela diretamente Judas, bainhira nia saran Na'i iha foho Oliveiras (kf. Mt 26,50; Lc 22,48); maibé iha Marcos nia narrasaun, Jezús nonook no nakonu ho dignidade iha eskolante nia traisaun eh hahalok makerek ne'e nia oin (kf. Mc 14,45-46), lahó liafuan haksiak nian.

- Mateus apresenta Jezús haksiak Pedro bainhira nia hakanek amlulik-boot nia atan hodi tesi kotu nia tilun-tahan ida (kf. Mt 26,52) no, iha Lucas nia narrasaun, Jezús husu ba dixípulu sira atu husik ema sira kaer nia (kf. Lc 22,51); maibé Marcos la apresenta, iha epizódiu hanesan, Jezús nia reasaun ida (kf. Mc 14,47). Marcos hatutan tan de'it katak Jezús nia dadur ne'e akontese atu kumpre Eskritura sira (kf. Mc 14,49).

- Iha tribunál judaiku, bainhira amlulik-boot husu nia kona-ba akuzasaun hasoru nia, Jezús mantein silénsiu solene no dignu (kf. Mc 14,61a), hodi lakohi defende An husi inimigu sira nia akuzasaun.

2. Teze fundamentál ida husi Marcos nia Evanjellu mak afirmasaun katak Jezús mak Maromak nia Oan-Mane (kf. Mc 1,1). Ideia ne'e mós ita hetan nia subliña no dezenvolve iha relatu paixaun nian:

- Iha to'os Oliveiras, molok ema kaer Nia, Jezús harohan ba Maromak (kf. Mc 14,36) no hanaran nia “Abba” (“papá”). Liafuan ida-ne'e la uza iha orasaun ebraika sira bainhira bolu Maromak; liafuan ne'e uza de'it iha intimidade familiár no esprime proximidade boot entre oan no nia aman. Ba psikolojia judaika, uza liafuan “papá” ba Maromak hatudu falta respeitu. Jezús, hodi uza liafuan ne'e, Nia hatudu komuñau ne'ebé iha entre Nia no Aman Maromak no revela relasaun ida marka ho simplisidade, intimidade, konfiansa totál.

- Maski Jezús hatudu silénsiu durante interrogatóriu iha amu-lulik boot nia uma, iha momentu ida Jezús buka esklarese ideia sira no hatudu momoos ninia divindade. Bainhira amulik-boot husu ba Nia diretamente se Nia mak “Mesias, Maromak di'ak nia Oan” (Mc 14,61b), Jezús hatán, la taka buat ida: “Ha'u duni. No imi sei haree Ema nia Oan-Mane tuur iha Kbiit-Na'in nia kuana no mai iha kalohan lalehan nia leten” (Mc 14,62). Espresaun “egô eimi”, “Ha'u duni” (susar tradús iha tetun) lori ita ba Maromak nia naran iha Testamentu Tuan (“Ha'u mak Ha'u” - Ex 3,14)... Afirmasaun ne'e subliña Jezús nia dignidade divina, ne'ebé loron ida sei mosu iha Maromak nia fatin, nu'udar juiz soberanu umanidade tomak nian. Amlulik-boot komprende Jezús nia afirmasaun ne'e katak sá (Nia foti An nu'udar Maromak Oan no nu'udar juiz universál); tanba ne'e, nia hirus hodi lees ninia hatais no kondena Jezús nu'udar blasfemu.

- Marcos fó sai senturiaun ne'ebé, iha Jezús nia krús ain hateten: “tebes duni, ema ne'e Maromak nia Oan” (Mc 15,39). Frazé ida-ne'e mak “profisaun fiar nian” ne'ebé Marcos konvida fiar-na'in sira hotu atu halo... Sai tiha sasin kona-ba buat hotu hakerek iha Evanjellu, ho modu partikulár, ida paixaun nian, konkluzau mak ida-ne'e: Jezús mak tebes duni Maromak nia Oan ne'ebé mai hasoru ema sira atu apresenta proposta ida salvasaun nian.

3. Maski Maromak Oan, Jezús Marcos nian ema mós no partilla natureza umana nia frakeza no frajilidade:

- Iha to'os Oliveiras, molok ema kaer Nia, Jezús Marcos nian sente “fuan nakdedar” no “angústia”/laran-susar (kf. Mc 14,33), hanesan buat ne'ebé akontese ba ema hotu iha mate

violentu nia oin (Mateus ko'alia moderadu uitoan: “tristeza” no “angústia”– kf. Mt 26,37; no Lucas evita halo referénsia ba sentimentu sira ne'ebé subliña Jezús nia dimensaun umana, no bele halo ema duvida kona-ba Ninia divindade).

- Iha momentu mate nian, Jezús harohan: “Ha'u-nia Maromak, Ha'u-nia Maromak, tanba sá Ita husik ha'u” (Mc 15,34). Jezús nia “orasaun” hanesan ema hotu ne'ebé koko solidaun, abandonu, sentimentu kbiit-laek, sensasaun fallansu nia “orasaun”; Nia la komprende tansá Maromak la besik no indiferente.

Ita la duvida katak Jezús ne'ebé Marcos apresenta mak ema mós, Jezús ne'ebé solidariza ho ema sira, akompaña sira iha sira-nia terus, ne'ebé koko sira-nia drama, frajilidade no frakeza sira.

4. Iha relatu hotu paixau nian, ita haree Jezús mesa-mesak enfrenta ninia destinu mate nian (ema lubun boot no dixípulu sira husik Nia mesak); maibé Marcos mak subliña liuliu Jezús nia solidaun, iha momentu dramátiku sira:

- Lucas tau anju ida konsola Jezús, iha to'os Oliveiras (kf. Lc 22,43); Marcos la halo referénsia iha ba momentu “konsolasaun” nian ida-ne'e.

- Mateus konta katak Pilatos nia feen intersede ba Jezús, hodi husu nia laen atu keta mete “iha ema justu ne'e nia kazu” (kf. Mt 27,19); Marcos la refere interferénsia ida nune'e iha Jezús nia prosesu.

- João, aleinde Pedro, refere “dixípulu ida seluk ne'ebé amlulik-boot koñese” iha Anás nia uma (Jo 18,15); Marcos, aleinde Pedro (ne'ebé nega Jezús dala tolu), nunka refere ba dixípulu ruma nia prezensa.

- Lucas ko'alia kona-ba feto sira nia prezensa, iha dalan ba kalváriu, ne'ebé “tuku sira-nia fuan no hanoin tebes Nia” (Lc 23,27-31); Marcos mós la ko'alia kona-ba ema ruma ne'ebé hanoin Jezús durante nia lori krús ba to'o fatin ezekusaun nian eh hedi Nia bá (Jezús mate tiha mak Marcos ko'alia kona-ba feto ruma ne'ebé tuir no serví Nia bainhira iha Galileia nia prezensa iha ne'ebá, “hodi hateke husi dook” – Mc 15,40-41).

Dixípulu sira husik Nia mesak, ema lubun-boot hakilar hasoru Nia, lider sira kondena Nia, soldadu sira tortura Nia... Jezús la'o mesa-mesak, iha abandonu, iha ema sira nia indiferensa iha dalan mate nian. Jezús nia hakilar ikus iha krús “Ha'u-nia Maromak, Ha'u-nia Maromak, tanba sá Ita husik ha'u” – Mc 15,34) mak inísiu Salmu 22 (cf. Sal 22,2); maibé mós, espresaun dramátika solidaun ne'ebé Jezús sente hadulas Nia.

5. Marcos mesak mak relata epizódiu joven ida falun an ho lensól de'it, lahatene sé loos ne'ebé tuir Jezús no halai molik bainhira guarda ruma tenta atu kaer nia (kf. Mc 14,51-52). Ba komentadór balun Evanjellu Marcos nian, joven ne'e mak evanjelista rasik... Maibé ida-ne'e ipóteze ida de'it.

Buat ne'ebé provável liu mak Marcos hatama epizódiu ida-ne'e atu reprezenta dixípulu sira nia atitude ne'ebé, ho deziluzau no ta'uk hasoru fallansu ba projetu ne'ebé uluk sira fiar bá, husik buat hotu bainhira haree ema kaer sira nia lider no halai lakon hodi la hateke ba kotuk.